

## **Communicaziun allas medias digl cumegn da Surses e dalla Turissem Savognin Bivio Albula SA (nr. 10-2020)**

### **Surses: Cumegn e purtaders da prestaziun èn pronts per la staschung d'anviern**

**An Surses ins è pront per la staschung d'anviern tgi stat avant porta. Igls concepts da protecziun tgi vignan pretendias da cantun e confederaziun per metter fragn alla pandemia da corona èn elaboros. Pinavant on igls gestiunaris dallas pendicularas e runals dumando agl cantun la lubientscha necessaria per manar igl travagl. Er las cundiziuns da neiv èn fitg bungas. Cun risguardar las reglas da distanza e higiena necessarias vess da star navot ple ainta peis per antschever bagn la staschung d'anviern.**

Igls firos da Nadal e las vacanzas ans mettan avant grondas sfidas perveia da diversas particularitads. Per redutgier igls cass d'infecziun da corona aint igl cantun Grischun e lubeir cotras da darveir igls menaschis digls stabilimaints da sport d'anviern dallas destinaziuns turisticas, on confederaziun e cantun relaschea maseiras rigurousas. Uscheia ston cumegn cun territoris da skis e blers giasts tgi fon sports d'anviern elaborar en concept da protecziun cumplessiv. Igl cumegn ansemen cun igl spital, las organisaziuns turisticas ed igls menaschis on stgaffia las premissas necessarias per saveir reager sen nivel politic ed epidemiologic da moda sperta e flexibla sen la situaziun da Covid-19 actuala ed igl svilup previsibel. Igls gestiunaris digls territoris da skis on elaboro concepts da protecziun anc pi strantgs, tgi adampleschan las prescripziuns naziunalas unifitgeidas. Per coordinar las maseiras sen igls sectours per diriger la circulaziun dallas persungas, digl contact tracing, igl management digls parcadis, l'avertura digls menaschis e digls concepts da protecziun da plazzas publicas (glatsch, cursa lunga, etc.), ò igl cumegn da Surses elaboro en concept da protecziun cumplessiv. Igl concept da protecziun sa basa sen la responsablada persunala ed igl respect digls giasts e dalla populaziun. Igl mastral Leo Thomann accentuescha tgi la sensibilada per la tematica digl virus, la solidaritad vicendebla e la responsablada persunala dalla populaziun, digls giasts e dallas collaboratouras e digls collaboratours digls divers menaschis, vign spitgeida dapertot e so neir ramplazzada da nignas otras maseiras.

La populaziun ed igls giasts an Surses vignan supplitgias da risguardar las maseiras da distanza e higiena. An zonas da pedunzs cun blera gliout vala l'obligaziun da purtar la mascrigna da protecziun. Ultra da chegl duessan neir evitadas folas aint igl spazi public.

Tinizong, igls 10-12-2020

Infurmaziuns:

Leo Thomann, mastral (E-Mail: [leo.thomann@surses.ch](mailto:leo.thomann@surses.ch), Tel. 079 405 96 73)

